



Wobzamknjenje Zwjazkowego předsydstwa Domowiny z dnja 17.03.2012

Jednanski porjad rewizijneho wuběrka Domowiny (rewizijny porjad)

§ 1 Zasady džěławosće

- (1) Rewizijny wuběrk džěła na zakładže artikla 12 Domowinskih wustawkow kaž tež postajenjow swojeho jednanskeho porjada a skutkuje samostatnje a njewotwisnje. Nastupajo přewjedženje pruwowanjow a hódnoćenje jich rezultatow njeje žanym wukazam podčisnjeny.
- (2) Rewizijny wuběrk pak nima za wobstejnosće, kiž přepytuje, žanu kompetencu k rozsudam, k dalšim jednanjam a k zastupowanju Domowiny. Džěła jako interny kontrolny organ Domowiny na financnym polu.
- (3) Čłonojo rewizijneho wuběrka (w dalšim: rewizorojo) skutkuja čestnohamtsce a maja narok na posedženski pjenjez a narunanje jězbných kóstow po plaćiwym porjedže Domowiny.

§ 2 Konstituowanje a dalše wuradźowanja rewizijneho wuběrka

- (1) W běhu dweju měsacow po wólbnej hłownej zhromadźiznje přewjedže rewizijny wuběrk Domowiny na přeprošenje předsydki/předsydy Domowiny swoje konstituowace posedženje. Předsydka/předsyda Domowiny zapokaza wuběrk do swojeje džěławosće. Na tutym posedženju wuzwoli wuběrk swoju předsydku/swojeho předsydu kaž tež městopředsydku/ městopředsydu.
- (2) Rewizijny wuběrk schadźuje so znajmjeńša jónu wob lěto k postajenju nadawkow, k wuhódnoćenju kontrolow a ke koncipowanju pruwowanjow. Posedženja zwoła a nawjeduje předsydka/předsyda wuběrka resp. w padže jeho zadźěwanja městopředsydka/městopředsyda. Jeli sebi to znajmjeńša dwaj rewizoraj žadatej abo jeli ma to zarjad za trěbne, ma předsydka/předsyda wuběrka w běhu dweju tydzenjow wurjadne posedženje wuběrka zwołać.

§ 3 Pruwowanske prawa

- (1) Rewizorojo smědža w zwisku z jich pruwowanskim nadawkom do wšitkich aktow a knihow towarstwa financneho razu pohladać. Woni maja narok na hnydomny přistup do podložkow a na trěbne dalše informacije.
- (2) Rewizorojo maja prawo, nimo přizjewjenych kontrolow tež bjez přizjewjenja kontrolować.
- (3) Rewizijny wuběrk smě hłownej zhromadźiznje a zwjazkowemu předsydstwu pisomne namjety k polěpšenju džěławosće Domowiny na financnym polu předpožić a po schwalenju wotpowědnych naprawow jich zwoprawdženje kontrolować.
- (4) Rewizijny wuběrk namjetuje hłownej zhromadźiznje we wobłuku swojeje rozprawy, hač so zwjazkowe předsydstwo na kóncu wólbneje doby wuwjaza.

§ 4 Winowatosće organow a zarjada Domowiny

- (1) Organy Domowiny a zarjad Domowiny maja rewizoram za pruwowanja dospołny dohlad do aktow a kontow financneho razu kaž tež njehaćene džělowe móžnosće zmóžnić.
- (2) Na přidatne prašenja rewizorow maja čłonojo organow Domowiny kaž tež přistajeni zarjada wobšěrnje a wěrnje wotmołwić.
- (3) Organy a zarjad Domowiny maja pokiwy rewizorow k wotstronjenju njedostatkow resp. K polěpšenju džěławosće hnydom wuhódnoćić a so wo jich wobkedźbowanje prócować.
- (4) Zarjad Domowiny pomjenuje přisłušneho zarjada za džěławosć rewizijneho wuběrka, kiž wšitke trěbne podložki k dispoziciji staji a zdobom protokolowanje wuslědkow posedženjow přewozmje.
- (5) Zarjad Domowiny ma rewizijnemu wuběrkej po zestajenju financneje rozprawy předchadźaceho hospodarskeho lěta hač do kónca februara noweho lěta podložki k pruwowanju přistupnić.

§ 5 Winowatosće rewizorow

- (1) Rewizorojo maja při zwěsćenju njedostatkow wšitke k posudžowanju tutoho pada relewantne podložki a informacije wěcownje hódnoćić.
- (2) Posudk rewizorow dyrbi so jenož na maćiznu pruwowanja wusměrić. Pisomna pruwowanska rozprawa ma so zrozumliwje a bjez subjektiwnych začuow sformulować. Wona předpožići so zwjazkowemu předsydstwu a hłownej zhromadźiznje.
- (3) Rewizorojo, kiž su při wěstych pruwowanskich padach zajeći, njesmědža so na pruwowanju wobdźělić.

- (4) Rewizorojo maja nastupajo pruwowansku maćiznu winowatosć k mjelčenju napřečo zjawnosći a medijam.
- (5) Na kóždym pruwowanju dyrbitej so znajmjeńša dwaj rewizoraj wobdźělić.

§ 6 Pruwowanske nadawki

- (1) Rewizijny wuběrk pruwuje znajmjeńša lětnje jónu:
 - wužiwanje wobsydstwa a financow Domowiny kaž tež jich porjadne knihowanje.
 - wobdźělanje pisomnych a ertnych kritikow a pokiwow, kiž měrja so na džěło Domowiny.
- (2) Dale pruwuje rewizijny wuběrk:
 - wotličenje po hospodarskim planje (inkl. wobličenje dobytku a stratow, wěcnu rozprawy a přehlad dalších srědkow).
 - ručnu kasu.
 - staw konta na spočatku a na kóncu lěta (po kontowych wučahach).
 - inwentarnu lisćinu.
 - zamóženje Domowiny.
 - archiwowanje financnych podložkow a dokladow.
 - dodźerženje financneho porjada.
 - planowanje srědkow za přichodne lěto.
- (3) Termin, časowy wobjim a wobdźělnikow pruwowanja postaji předsydka/předsyda rewizijneho wuběrka resp. w padže jeje/jeho zadźěwanja městopředsydka/městopředsyda.
- (4) Wobsah pisomneje pruwowanskeje rozprawy schwali so na posedženju rewizijneho wuběrka.

§ 7 Nabyće plaćiwosće a změny

- (1) Rewizijny porjad nabudže ze schwalenjom w zwjazkowym předsydstwje swoju plaćiwosć.
- (2) Změny porjada ma zwjazkowe předsydstwo schwalić.